

FRIÛL ORIENTÂL E AUTONOMIE REGJONÂL

I nestris amîs furlans dal Gurizan e di dute la Furlanie tra il Lusing e il Judri, nus àn plui di une volte fat cognossi il lôr pinsîr sul proposit dal moviment autonomist.

In realtât lôr si cjatin a jessi, sot di cualchi pont di viste, in condizions diferentis dal restant dai furlans.

La division politiche de Furlanie causade di Vignesie, inmò cinc secui indaûr no je rivade adore di creâ une division etniche ni linguistiche ni spirituâl; ma e à dividudis lis condizions di vite e il cors de storie. Cussì il Friûl orientâl al à une esperience di vite autonomistiche durade dal 1860 al 1918, che il Friûl Udinês nol à. E su chest pont il Friûl Orientâl al à une sensibilitât che noaltris no podìn trascurâ. In secont lûc la cuestion de convivenza tra furlans e sclâfs, in chês zone e je za une vore scotant, plui inmò di chel che no sedi inte provincie di Udin. Il confin politic che al vignarà segnât daûr dal tratât di Parîs, al è un confin economicamentri impussibil: al puarte a la paralisi dai scambis inte citat di Gurize e in chês part de provincie che e reste sot de Italie, e inmò plui in chês part che e va a finîle sot de Federative Jugoslave. Chest lu capissin benon, tant di cà che di là. Duncje il confin politic nol podarà jessi o durâ come confin economic. Si scugnarà par fuarce vierzi tratativis tra chescj e chei par evitâ barrieris doganâls che a causaressin il spopolâmint e la muart di chei paîs.

Par chestis resons e par altris di chest gjener i gurizans a son persuadûts che l'ordenament autonomistic regjonâl intes formis che la Constituent e intint di dâ a dutis lis regjons, nol presente garanzis di sodisfâ par nuie lis lôr esigjencis. E cun dute la lôr ferme volontât di restâ unîts al Friûl udinês no puedin contentâsi di jentrâ a fâ part di une regjon, dulà che lis provinciis - se a restaran in piis in cualchi forme - si ridusaran intun ufizi dulà che si trasmeti pratichis ai orghins centrâi.

Cheste e je la reson de lôr insistence su la autonomie de lôr provincie integrate cui teritoris di Monfalcon, Grau e Sarvignan.

Denant di cheste situazion si presente une sole maniere di disgredeâsi: che la Regjon furlane e vegni costituide in Autonomie particulâr, cuntun ordenament a stamp cjantonâl, indulà che Gurize e vebi, dentri dal limit des sôs cuestions speciâls, une libertât di moviments ancje denant dai orghins regjonâi. I gurizans no àn nuie in contrari, anzit a son dal dut a favôr che ancje Udin, Tumieç e Pordenon a conservin, pai lôr interès, chês stesse libertât.